

四庫全書

集部

欽定四庫全書

集部

文苑英華卷六百七至九

詳校官給事中臣李臺

助教臣常循覆勘

總校官進士臣朱鈺

校對官中書臣胡紹基

謄錄監生臣李維瀛

欽定四庫全書

文苑英華卷六百七

宋 李昉等 編

雜上請一

請罷功臣襲封表一首

為于侍郎請尚山陵表一首

請省自披讀表一首

請廢在官諸司捉錢令史表一首

請千牛不簡嫡庶表一首

為原州趙長史請為亡父度人表一首

為獨孤氏請陪昭陵合葬母表一首

為某官等請預陪告廟獻捷表一首

為汴州司馬唐授衣請預齊會表一首

為文武百官等請造神武頌碑表一首

為韋將軍請上禮表一首

為盧從愿請替東都留守表一首

為羣公請公除表一首

請罷功臣襲封表

長孫無忌

貞觀十一年令諸功臣世襲刺史錫之土宇以無忌為
趙州刺史封趙國公都一十四人無忌與房玄齡等上
表曰臣聞質文迭變皇王之跡有殊今古相沿致理之
方乃革緇維三代習俗生一作非常爰制五等隨時作教
蓋由力不能制因而利之禮樂節文多非已出迨夫兩
漢用矯前違置守頒條蠲除襲弊為益之大四字一作為無益之

大單及萬方不易之禮

四字一作建
不易之禮

有逾千載今曲為

臣等復此奄荒欲其優降錫之茅社施于子孫永貽長

世斯乃大鈞播物秋毫一作毫髮並施其生小人踰分後世

必嬰其禍何者違時易務曲樹私恩謀及庶僕一作僚義

非僉允方昭史冊之誦有紊聖道之綱此其不可一也

又臣智効罕施器識庸陋或情緣右戚遂陟台階或顧

英華作顧非想披荆便蒙夜拜直當今日泰一作猶愧非才重

裂山河逾彰濫賞此其不可二也又且孩童嗣職義非

師儉之方任以褰帷寧無製一作傷錦之弊上干天憲曩

典既有常科下擾生民必致餘殃於後一挂刑網自取
誅夷陛下深仁務延其世翻令勦絕誠有可哀此其不
可三也當今聖歷欽明求賢分政古稱良守寄在共理
此道之行一作目非為日滋久因緣臣等忽有改張封植兒
曹失於求瘼百姓不辜一作幸將焉用之此其不可四也

在茲一舉為損實多曉夕深思憂貫心髓所以披丹上

訴指事明心不敢浮詞同於矯飾伏願天澤諒茲一作其

愚款停其渙汗之澤一作旨賜其性命之恩

一作皆舊唐書本傳

為于侍郎

類表
作中

請尚山陵表

已見五百
七十一卷

上官儀

請省自披讀表

褚遂良

臣遂良言伏承風氣小動正進湯藥臣荷恩光不勝愁懼既聞御膳平和一則以喜伏惟陛下異人者神明同人者五情夫人之生以神為主神太用則虛形太勞則倦有此而不生疾者非所聞也陛下昔年力平寇亂及

臨寶位憂勞萬國龍荒沙漠何所不思情切於此無時
懈怠遂令陛下鬢鬚之早白又數年已來耽翫書史每
作文詠兼諸手筆日暮繼燭運心不停又詰朝與羣臣
論政數百千語音若韶夏理同蘭玉若非辛勤何以得
此且以天情愛好不能自息臣愚誠恐陛下今猶看讀
夫人年踰四十筋力漸疲篤而不休更增疹疾然君以
百姓為心百姓以君為命君體平康天下安寧陛下已
讀得之者用之不可盡已知者當世不能踰伏願節諸

言語且無披卷每減思慮微疴自遣天下蒼生之所幸
賴臣不勝區區謹敢表聞伏願無覽臣之表遣傍人讀
知臣意臣願足矣下愚之情伏深戰灼

請廢在官諸司捉錢令史表

臣遂良言古稱君為元首臣作股肱梁棟榱桷隨能助
化所謂成海取乎細流崇山由乎積壤然則為治之本
在於擇人不正其原遂差千里周禮卿大夫之職考士
德行獻之于王王拜而受之登于天府漢家以明經拜

職或四科辟召必擇器任使量才命官然則市井子孫
不居官吏大唐制令憲章古昔商估之人亦不居官位
陛下許諸司令史捉公解本錢諸司取此色人號為捉
錢令史不簡性識寧論書藝但令身能估販家足貲財
錄牒吏部便即依補大率人捉五十貫已下四十貫已
上任居市肆恣其販易每月納利四千一年凡輸五萬
送利不違年滿授職然有國家者嘗筭漢世賣官今開
北路頗類於此在京七十餘司相率司副九人更一二

載後年別即有六百餘人輸錢授職伏惟陛下治致升
平任賢為政或太學高第或諸州進士皆策同片玉經
若懸河奉先聖之格言慕昔賢之廉恥拔十取五量能
授官然犯禁違公輒罹刑法况乎捉錢令史主於估販
志意分毫之末耳目鄺肆之間輸錢於官以獲品秩在
再年歲陛下能不使用之乎此人習與性成慣於求利
苟得無恥豈蹈廉隅使居其職何向而可將來之弊宜
絕本源臣每周遊民間為國視聽京師僚庶爰及外官

異口同辭咸言不便臣無容靜嘿輕敢表聞伏願更勅
朝臣遣其詳錄輒煩聽覽伏深戰慄謹言

此篇六百七
十七卷重出

今已
削去

請于牛不簡嫡庶表

臣遂良言臣聞主祭祀之膺必資於嫡長擢文武之材
無限於正庶故知求賢之務有異於承家前王制禮緣
情斯極永嘉以來王塗不競在於河北風俗頓乖以嫡
待庶而若奴妻遇妾而如婢廢情虧禮轉相因習構怨

於室取笈於朝莫能自悛死而無悔降及隋代斯流遂
遠獨孤后罕睢鳩之德同牝鷄之晨普禁庶子不得入
侍自始及末怨曠未弭聖朝御歷深革前弊人以才進
不論嫡正自茲二紀多士如林今者簡千牛舍人方為
此制臣竊思審於理未安何者母以子貴子不緣母也
今以母非正室便言子無貴仕則趙衰孕於越婢遙集
晉阮孚字遙集
其母即胡婢產於胡媪田文枚臯皆妾子也文則播
美於強齊臯則有聲於隆漢未聞前載有所問然此類

甚多備存史冊不敢煩引輕黷宸嚴今反棄古實從近
事以妬忌之政施明駁之日非徒英雋交屈固亦競端
斯始王者設教務慎其源源流一開為弊必甚儻側室
之子負才而不用君棄之於上家輕之於下忠孝不展
友愛無施如此等人豈不怨憤雖隔干牛之選仍許三
衛之官色類乃復稍殊捍禦至竟無別若惟才是用人
自甘心一彼一此異端斯起至於昨來檢括羸人公孫
武遠及崔仁師等兒多是嫡子故知善惡由乎積習邪

正寧限嫡庶必然之理不言可明伏願更量可否還遵
昔制不使側室之胤有高才而被屈正妻之子雖至愚
而獲用則嫡庶於此分鑿諍訟無因發矣前選已了不
更追乃今補闕猶得詳審臣蒙恩獎擢廁近司事有未
安豈敢自默謹以表奏伏增惶悚

為原州趙長史請為亡父度人表

王勃

臣某言臣聞奉忠履義帝業所資昭德報功王風是切

臣亡父故臣使持節都督豐州諸軍事豐州刺史上柱
國南康郡王士達往因隨季預奉皇初于時元洛未清
雙嶠尚梗江淮海岳王公數十亡父身羈偽鄭寵極戎
庭掃千載之風雲擁三河之士馬情思奉順義不圖生
綿越寇場密歸誠歛登太行而耀甲則建德離心出函
谷而揚麾則王克破膽天書屢降手勅仍存洎乎九服
久安四方無事謀臣出鎮猛將臨邊西窮赤水之源東
究青丘之境橫戈北塞盡沙漠之風塵授鉞南荒被牂

荆之矢石義形夷險迹遍疆場分閫淹榮懸車遂禮雖
死於牖下實懷天子之恩力盡方隅無愧忠臣之節今
者歸藏有日先遠戒期陛下德被遊魂惠流枯骨高班
厚祿已極於生前列鼓鳴簫復光於身后誠非毀滅所
能投報但臣霜露之感瞻彼岸而神銷烏烏之誠俯寒
泉而思咽希開淨福庶補窮埏伏惟陛下恢不次之恩
錄無缺之請使獲從朝例賜許度人濟魂一作沉識於昏
塗拯亡靈於燬宅則陛下乾坤之施既不隔於幽明微

臣螻蟻之心豈忘情於家國是所圖也非敢望也輕黷
冕旒若墜冰谷

為獨孤氏請陪昭陵合葬母表 李嶠

妾獨孤氏言妾早罹艱罰終鮮急難門構傾頽宗緒斷
絕零丁在疚微眇何依賴母氏劬勞顧存鞠撫漸離廷
瘵以至成立夫馬含識烏鳥有情空懷返哺豈曰能養
枯鮮何幾隙駟不追擗地扣心仰天泣血應門乏五尺
之嗣當室無三年之主衣衾之舉誰則始終奠醑所存

實寄惇眇今日月斯邁竄策告期將安宅宥或從遷祔
妾亡祖唐右衛大將軍溧陽縣公彥雲迹叅締構功勒
鼎爨亡父唐某州折衝都尉襲溧陽縣公臣某寵懋戎
行嗣守藩服咸得託基喬岳陪瘞穀林杜氏階前雖云
非古齊君牖下義彰自昔儻蒙返魂舊塋合骨先壟則
存歿榮幸幽明感戴妾百罹兼至六極備嘗雖送往飾
終無資石槨之厚而傾家破產不贍塗車之費先臣苴
茅舊封食采遺業頌諸同族散在別房相彼晉河事憑

先德永言書社宜奉大宗伏望哀此孤微惠以綵紉迴
一歲之邑入助千齡之宅兆豈惟哀多益寡有叶典經
固亦勸義篤親實允觀聽妾生輕茨藿地接葭葦承夏
禹之致孝屬唐堯之敦叙荒情謬欸輕敢上祈天造曲
成儻蒙哀遂無任窮懇之至謹詣朝堂奉表以聞穢黷
冕旒伏增戰越

為某官等請預陪告廟獻捷表 前人

臣某等言臣某沐道昌期承榮休歷或叨恩獎擢謬隨

州縣之班或收拙罷歸行戢丘園之影徒懷闕庭之感
終絕雲霄之望不謂幽誠上達卑聽下臨太陽之暉遠
鑒於傾藿油雲之澤俯潤於織荆俱延鶴板之恩遂忝
龍闈之召雖秦君入夢暫喜登天晉士披心長祈捧日
豈足方其榮幸匹此歡泰今三軍凱入邊境廓清五室
恭禋靈祇配享介冑承策勲之禮衣冠陪執豆之儀萬
辟同趨百蠻在列有識搖心而竊抃含靈廓背而延頸
臣等鞠躬天闕待命帝閣馳心目於九霄隔門庭於萬

里企悚之志徘徊罔極伏望俯垂矜察曲賜叅陪使得
接影蹒蹒克鳥獸之前列隨肩濟濟望夔龍之後塵則
夕死朝聞有欣於服道千齡一遇無憚於灰骨不任延
佇企悚之至

為汴州司馬唐授衣請預齋會表

前人

臣某言臣母氏齒髮既衰風氣彌積寢興乖豫定省不
安陛下降視萬方俯矜一物哀老母虛羸之疾愍愚臣

煎迫之私弘以不匱之思布以非常之澤使得暫辭藩

岳別梁郡之檐帷旋赴京都求越人之砭石自班與首

路潘宅來歸承厚蔭於四天接歡言於九族雖名一作

醫上藥研祕術而未嘗而佩德感恩覺沉疴之半愈屬

千齡啓旦十號登樞演金石之微言呈玉毫之寶相三

千國土俱傳貝葉之丈億萬天人並入蓮花之會臣六

時空念五起未寧思酬顧復之恩願假招提之福儻獲

書名檀供厠影法筵罄歸依迴向之心受清淨菩提之

果實望三身覆育開梵帝之仙坊十善護持發醫王之
祕藏永離災厄長登福壽上以祈龍象之深惠下以申
烏鳥之懇誠豈唯區區闔門獨荷於仁覆故亦悠悠法
界永葦於孝理不量淺薄敢輕上祈塵黷威嚴伏增戰
越臣某誠惶誠恐頓首頓首

為文武百僚等請造神武頌碑表

中宗

宋之問

臣某等聞行至公者莫先於發揮茂實垂不朽者不若

於刊紀洪名伏惟應天神聖皇帝陛下德披圖五精
乘運先天地而利用依鬼神以制法無思不服有感必
通日者變起心脅禍生肘腋弄兵指闕敢忘下濟之恩
犯門斬關遂激上靈之憤陛下近幸玄武傍顧紫微鳳
翔而梟獍失圖龍見而鯨鯢就戮順天翊聖皇后配乾
積德從帝居尊佐莫大之英猷叅非常之妙略親紆寶
思式頌玄猷椒掖之丈久垂河漢甘泉之石已入京都
伏惟陛下卑奉聖躬謙保神器惜其國用念彼人艱有

命且停含靈失望臣等容光壽域竊位明朝不蚕而衣
無裨塵露不耕而食有負靈祇陛下寢有道之豈碑臣
等享無功之厚載一作祿亭育雖廣何所自容且天惠不
可以闕書神功不可以久寂臣等請各減所俸以勒殊
休庶同子來成之匪日無任光開一作文闡垂裕之至

為韋將軍請上禮表

崔融

此篇當在六百十三卷上禮門今已移入姑存其

目

為盧從愿請替東都留守表

臣某言臣才輕位重効淺恩深鸞駕西巡猥忝居守違
離罕畢進退門闌感戀惟深負乘是懼臣某中謝臣初
辭之日伏奉德音限以周年許遵舊例推遷荏苒星歲
再環夕惕屏營日月以冀葵藿傾葉豈望迴光犬馬有
心常懷戀主顧循卑鄙未敢上聞伏承今孟冬有事陵
廟慶章覃於四海國禮盛於百王伏念漢臣彌嗟留滯
預逢舜后願侍宗禋瞻望之情倍百恒品且三川朝市

四塞關河論都抗於西賓作鎮雄於東夏倉儲猶在邦
政孔殷臣亦何人久新重任不勝控欵兢惶之至謹奉
表附驛以聞伏乞俯矜誠請更擇親賢不棄草茅之微
終奉綸綍之委

為羣臣請公除表

蘇頌

此篇當在五百七十一卷遷祔門今已移入姑存
其目

丈苑英華卷六百七

欽定四庫全書

文苑英華卷六百八

宋 李昉等 編

雜上請二

將加神龍尊號羣官請公除表一首

為崔冀公請赴山陵表一首

為宰相請不停千秋節宴會表一首

請入湯表一首

代郭令公請雪裴僕射表一首

為衛尉許卿請留男表一首

為人請合祔表一首

為崔僕射請弟寬當元載累表一首

為郭令公請授四節度大使及五府大都督表一首

安西請衣賜表一首

請置兩省官表一首

為趙侍郎乞歸河中侍兄表一首

為王相公請改六書表一首

為河東副元帥馬司徒請刻御製箴銘碑表一首
為中書門下請追尊號表一首

中書省請冊皇后表一首

史館王相公請冊淑妃何氏為皇后表一首

將加神龍尊號羣官請公除表 蘇頲

此篇當在五百七十一卷遷祔門今已移入姑存

其目

為崔冀公請赴山陵表

已見五百七十一卷

于公異

為宰相請不停千秋節宴會表

玄宗

孫逖

臣等伏見太常卿常紹奏稱京兆韓朝宗面承進止云
若更不雨即停作千秋節者臣等伏以千秋令節萬壽
良辰上以答皇天啓聖之休下以展蒼生務農之望禮
白帝賽田神著在典式久通誠感陛下以經旬不雨憂

人軫念有阻羣情將停盛德疑勤恤之旨被物以深而
祈報之歡於義難間况近城郊甸雖以憊陽自餘郡縣
頻霑霈澤今自東京起居使魏方進至臣等親問方進
云自陝以東數日一雨秋稼滋茂特異常年此則萬庾
可期三農無害近郊之內雖未霑霈率土之濱已知豐
衍太平令典豈可闕如又數年以來此禮頻廢臣子之
地獻壽無因朝野之情多歡莫展特希天鑒俯暢人心

請入湯表

常 袞

臣袞言臣先患腰膝比成積疾自從趨侍漸覺痊除每屬陰寒即微發動近加秋冷轉不支持半身風痺右足拘急謂其冷甚因以熱攻遂覺頭旋魚之眼暗寒溫相觸調息實難伏蒙聖慈特賜醫藥殊造至深灰粉酬恩未申萬一生成之功雖則頓瘳積久之癥固難速效沉綿增劇憂懼失圖先因入湯常愈斯疾漸逼冬候今正其時伏望天恩許臣就湯將息駕駘蹇步冀効驅馳螻蟻微誠庶迴昭鑒無任懇迫之至謹奉表陳乞以聞

代郭令公請雪裴僕射表

代宗

邵說

大歷中

臣某言臣聞忠邪不可以並立善惡不可以同羣吳任
宰詬而伍胥鳴夷楚任靳尚而屈原放逐遠惟前事孰
不痛心伏見澧州刺史裴冕明允忠肅道高德厚匪躬
無怠有謇諤之風首佐先帝驅馳靈武贊雲雷之業成
社稷之勲程元振忌其直道缺方遂加誣構缺謫荒裔
天下稱冤空懷醜正之悲莫雪盜憎之耻今姦邪屏退
聖政文明百度惟貞四門已穆而寰海之內元元之人

莫不延首德音思聞至化伏願特令追冕列在朝廷俾
之台座端揆庶僚平章百姓處訃謨之任當燮理之權
必能叶和萬邦致君堯舜臣位兼將相職忝股肱竊思
賢傑共熙帝載無任懇迫之至

為衛尉許卿請留男表

于邵

臣某言臣男某官某頃年二十一二因外人招誘性乏
天和臣又拙訓遂交遊非類妄用錢物臣恐滋蔓累及
家私臣某年任寧州刺史表請磧西効力離鄉別親庶

其思過臣遽缺流竄比屬艱難遐荒萬里分為阻絕近
節度使差奏軍事會臣待罪輦轂重與相見至京以來
臣竊窺察誘其由衷似辨君親近於觀志屢申懇倒願
留晨昏夫物感人情況茲天屬苟及於此惕然關心臣
今齒髮衰暮唯生此子倘其改行家有所傳九原之下
可以塞責臣昨詢問磧西職掌殊非要重伏乞聖慈迴
鑒許為父子如初便留劾節東軍與叔冀逐急征討盡
其武用或樹功勳王事不殊殘寇又切臣得地近時復

知聞縱其不賢猶可備缺老臣之幸至微至賤輕黷宸
嚴覲冒之求戰越無地

為人請合祔表

前人

臣某言臣固不肖寵由父任累荷朝獎非臣本才永惟
策仕之初濫觴有地感舊恩愛竊係于心故開府儀同
三司兼太常卿李承光頃充河西兵馬使天寶年中錄
臣帳下自茲效用得列戎班出入五涼艱勤一紀風雨
寒暑未嘗廢離俄屬幽燕作逆伊洛陷寇蒲潼不關天

地交閉承光臨計自失倉卒西還亦既通表華陽奉牋
靈武枕干待命俟期而往曾未信宿先朝賜書敦叙兄
弟如家人禮當是時也臣親見之開緘涕流是日便發
及至行在特加天下兵馬副元帥改名匡國扈蹕彭原
別承誥旨因此伏法當瘞朔陞身雖受刑家免孥戮遽
蒙昭雪發使宣恩特令安存葬日官給今長男願見克
鎮西副將次子諤又知覃懷兵馬女婿周鼎分閭河西
咸受綠車之榮並為白馬之將聖朝寵寄洎男及女臣

謂匡國雖死猶生近以孀妻告終願從合祔諤等銜血
無由上陳將傳銘誅未正官爵且匡國非禁人收視之
責微臣當故吏願言之時輒冒宸聰乞從優贈縱前封
尚在詎敢追榮倘後命有加方期復魄則衛青有時將
葬而樂布不負一言黃泉有知丹慊斯在無任懇款求
哀之至謹詣某門奉表陳乞以聞

為崔僕射請弟寬當元載累表 前人

臣寧言伏見詔命以中書侍郎元載贖貨無厭姦邪迹

露國有明憲已寘嚴科臣弟御史中丞寬頃緣長春宮
事蒙恩克載判官今罪累所加寬亦合從譴責念其愚
直罹此禍階每荷聖朝獎拔之私累忝中臺精選之務
因逾所効寵貴當時上答之期分知死所臣忝骨肉之
分休戚是均夙夜震驚反側難措朝典輕重不為微臣
伏乞聖恩無以私貸伏增惶懼之至謹遣某官某奉表
請罪以聞

為郭令公請授四節度大使及五府大都督表

王諫

臣某言皇太子者王之枝葉固當使之繁茂以蔭本根
國家自頃以來率由此道莫不重其職任以維四方如
朔方范陽河南隴右劍南等州節度大使并五府大都
督一切並用皇子以相監統內以制姦宄外以威寇戎
雖未合封建舊章亦所以廣維城盤石之義也自羯胡
肆逆海內糜沸務求武將授以兵權於是大使大都督
之職廢而不復用矣近日僕固瑒梟夷之後陛下以朔

方巨鎮寇逆未平將授其使賜臣靈州大都督單于安
西大都護朔方節度使此一時之事非經久之術今妖
氛電掃中外小康忝職樞衡代天理物固合遵守舊典
宣明國章豈可復竊大名紊亂常式此臣所以內懷冰
炭俛仰增慙伏乞選之親王授以斯任俾臣兼靈州長
史及副大都護節度大使佐理其中并諸府節度亦望
準此處置四夷間親王分鎮必當遠近畏威將亦絕其
覷心不敢妄動又大元帥頃者並無親王為之自皇太

子冊在春宮遂罷斯職今但置元帥司馬而元帥未有其人四方將帥之臣無所稟命亦望陛下復授皇太子以振兵威此國家要務也臣前月已具聞奏陳其事猶懼陛下未察愚言不以為念是以敢再三抵冒昧死上陳倘允臣所祈天下幸甚無任懇願之至

安西請衣賜表

臣奉某月日勅令臣河西揀招五千人赴磧西逐面防捍者臣到西安之日安西早以翻營軍令有行因不敢

息鈇衣不解吹角便行邊庭路長去去彌遠往還三萬里辛苦二周年朝行雪山暮宿水澗溪深路細水麤缺

大約一程少亦百渡人膚皴裂道上血流畜蹄穿跂

才與切行不進也

路傍骨積征馬被甲塞草不肥戰士戎衣胡

風盡化今邊秋早冷赤肉迎霜臣準勅放還實恐磧途

凍死伏惟矜慈育物遠念單寒請令安西給付綿帛蓋

其凍露路免疆

疑作

屍生入鈇門死將不朽

請置兩省官表

權德輿

臣德輿言臣聞堯之為君也百工允釐舜之官人也九

德咸事伏惟陛下文明御寓建用大中德厚侔於

集無於字

二儀利澤施及

集無及字

四海中外庶政寢興求思舉一事

必稽於禮法命一官必詢其望實故朝無虛授時絕幸

人厲精萬樞超冠前古可封之俗比屋相歡詩曰嗟我

懷人寘彼周行言思其才也又曰翹翹錯薪言刈其楚

言選於衆也蓋在旌別能否循責功實以爵祿為砥礪

以羣才為銛刃則舉不失職人効其能左右掖垣首承

詔命奉行詳覆各有攸司然後下於中臺頒於海內誠
至重也彌綸政事侍奉軒墀分曹十員今則殆絕昔衛
多君子晉有卿材况巍巍聖朝淳化所被濟濟多士豈
謝古人要重之司曠闕既久則事有所壅吏得為非亦
慮四方間知謂朝廷乏士事關理道豈止官常臣以凡
庸過蒙慈渥塵汗清近超集作越等倫前後對敷備承
獎飾德音顧問魂爽震驚而朴訥孱微不能自達又去
四月三日面奉進止令臣有所見即條疏奏來者輒以

愚管手疏上陳

集作聞

干黷宸嚴伏待罪責無任兢懼隕

越之至謹奉表以聞

為趙侍郎乞歸河中侍兄表

臣某言臣私門積釁幼集荼蓼賴諸兄訓育得漸有成

比登官序各限中外聚居則少離別則多

類表作為別居多

兄

薰頃任河中少尹先因風痺成疾手足不理于今累年

中間迎到上都

類表作京

臣自躬親方藥兄以扮榆松檟盡

在河東懷土之心暫來輒去近從數月頗益沉綿形貌

支離言詞蹇澁甥侄數輩年盡兒童雖在左右未能侍

類表
作奉

養欲重迎至此在兄則羸瘵難堪將馳往近關顧

臣為官守所繫魂銷氣索志往形留百憂攢心動失次第伏以聖慈涵育至德潛通肖翹之倫各遂其性特乞罷臣所職許以還鄉倘得數歲侍兄必冀沉痾有間然後星言匍匐稽首闕庭臣之至願於斯萬足無任懇願迫切之至

為王相公請改六書表

武后

臣某言臣聞兩儀定位法象必在於區分百物正名稱謂不可以相奪然則當至公之運勿用於權處大朴之辰宜循其本臣竊見周官保氏教國子六書一曰指事二曰象形三曰諧聲四曰會意五曰轉注六曰假借夫假借者謂本無其字假用音者也昔伏羲氏仰觀法於天俯觀法於地爰造書契是生文籍夫書者著也篆者傳也所以昭著誓言傳之不朽推意結字斷天下之疑垂萌示象紀天下之德安可穿鑿音韻假濫言詞者哉

自史籀篇亡李斯簡脫古文有數物類難周雖魯恭王
壞孔子之宅河內女子毀老聃之家而屋壁之餘門庭
蓋尠敬侯所寫凋訛於正始之間汲冢所開散落於太
原之際由是後儒晚學苦音訓之繁耆生故老嗟異同
之雜下兼案牘旁洎質劑聽受施行莫能見曉規摹典
憲於何取則不有釐改孰導羣疑當今受神冊鑄寶鼎
封禪之隆固將九皇比德文章之盛豈直三代同風百
官以理萬人以察臣此一作伏見御筆前後所製新字

等神功開合天地盤旋於筆端玄造運行日月相望於
紙上玉牒石記無以校其幽深河圖洛書不能方其麗
則臣幸承皇訓親沐聖猷窺東國一札之文奉西京七
言之詠劉德之陳雅樂雖未澄心劉儻一作黨之學史書
頗嘗遊目輒欲循環睿旨罄竭蒙情凡所借音並加新
字將令分有一定無汨於源流理或萬殊各隨其事業
以此化俗佇微益於毫釐以此教人儻不虧於影響伏
乞上玄卑聽至道曲成於此庸愚霈然聽許臣即望以

類撰綴隨了進呈輕觸冕旒不勝惶惕之至

為河東副元帥馬司徒請刻御製箴銘碑表德

宗

臣燧言臣前竊睹御製賜靈鹽節度使杜希全君臣箴一篇輒請刻石於太原興王之都與玄宗所製起義堂頌碑並列垂訓後代光示萬邦伏奉批表及賜臣等手詔俯蒙允許仍賜臣一本又賜臣御製宸宸台衡銘二首并叙精義微言深于義文之旨明訓大誠叶于舜禹

之暮涵

類表作函

周詩而軼商頌準天地而懸日月五彩彰

施而溢目八音均調以動心至於上下咸和君臣交儆

僻邪無自而入猜虐不萌於中鬱堙底伏之氣宣強悍

類表作儉巧

讒諛之說泯援申甫以作誠紹唐虞而追蹤誠

文教之極而至治

唐諱

之本也臣餘生陋質材朽功微陞

下獎勵過深寵錫逾厚使得獲睹殊觀接聞至音日以

勲賢稱其威武跪捧震駭顧循悚忤實願周旋奉戴內

以為子孫藏恢演昭宣外以垂金石刻今者琢磨已就

刊勒方施至於

類表作其

次序篇章論載年月未敢即定謹

令圖畫進上仍請於碑首正面刻

類表作利

作御製箴銘四

字其下刻年號月日字建箴銘二首并序其碑首陰面

伏請準起義堂頌碑例刻年號月日字建其下刻臣所

上表䟽伏蒙批表勅語及所賜臣手詔庶使後之觀者

尋其并連究其本末以知盛德之事懿鑠丕顯游揚無

極臣之所願也不勝忻懼悃懇之至謹遣某官臣某奉

表以聞臣誠懽誠喜頓首頓首謹言

為中書門下請追尊號表 宣宗 杜牧

臣某等言伏以收復河湟廊開土宇北絕梓嶺西過榆
溪壯中夏起塞之雄奪西戎理弓之地至使強虜不敢
觸鋒山鎖七關地闊千里歌狸首而息射詠杖杜以勞
旋聖德神功超今越古某月日臣某等於延英殿面奉
德音陛下以克定舊疆獲成先志歸功祖考追尊鴻名
臣等伏念國家之為理也溢三皇之軌躅奮百代之上
下天寶之末天下大集作泰寧恃富貴集作庶而醉飽非集作

無虞韜干戈而兇逆借作大歷貞元之際河北河南之地朝廷行姑息之政郡國皆叛亂之臣苟且之令行畫一之法廢日增月長雄唱雌和李錡宗子劉闢書生東據石頭西斷劔閣朝廷所有唯止西京伏惟憲宗皇帝順上帝之心酌列聖之法爵不踰德集作舉不失賢親端莊之正人去側媚之邪士集作親莊正之人去側媚之士然後提挈綱紀震疊雷霆誅夷羣兇洒掃四海百度如律九功可歌天業益張聖統無極詩曰惠我無疆子孫保之復曰

周雖舊邦其命維新伏惟元和之初

集作功

實開中興之

業伏惟聖敬文思和武光孝皇帝陛下修先王之道
行天下之達德廣問延諫褒直盡下首雪冤獄常對法

官是

集作則字

虞舜卹刑文王慎罰無以過也開張聰明延

納諫諍守職業者無職不舉被言責者無事不言皆獲
甄昇豈惟假借夫仲尼以三人有我師大禹以愚夫能
勝予是仲尼之好問大禹之拜言無以過也是以百姓
手足皆安於錯置四海風俗益臻於和平尚猶子

集作午

夜觀書日是聽政下採人病上求天端帝典曰聖敬日

躋湯銘曰日日新是誠

集無誠字

陛下之德有以方之

集作過之

仲尼曰禹立三年百姓以仁遂仰陛下之至理知孔聖

之可驗矣西戎強盛自古無之包有引弓之人盡臣

集作

為跨馬之國天下獻力備邊不克四海輸賦養兵不足

廣川薦草盡為所有健兵倅馬不可當鋒雖李廣材能

充國沉勇但能閉壁

集作疊

豈敢交綏伏惟聖敬文思和

武光孝皇帝陛下畜睿筭於雲

集作霄

漢之表畫聖謀於

造化之先捕虜將軍射聲校尉羽林突陣之騎酒泉校

尉

集作射

之兵親自指蹤同時受命信星効祉靈旗呈祥

壁壘言言而洞開渠魁纍纍

集作而

自縛解辮削衽投

戈委弓懾怛威靈懽呼冠帶破種徙域空漠淨邊指北海而封燕然中西域而立幕府鄭吉之理烏壘班超之鎮他乾大庇生人一寬天下昔漢武帝之逐北虜四海耗半殷高宗之伐鬼方三年乃克尚書班史稱德詠功今陛下用仁義為干戈以恩信為疆場所求必至有開

必先不遺一矢不頓一刀洗八聖迴首

集作
肝食

之恨刷百

年亡地之羞小雅盡興大業無極為而不有歸功先帝
禮曰天子有善讓德于天仲尼曰武王周公其達孝乎
盖以善於繼述能光祖考今者陛下謙讓之道符於禮
經繼述之孝稱於孔聖臣等待罪宰相目覩昇平謹具
太常追尊順宗皇帝憲宗皇帝謚號如前伏候

集作
聽

勅

旨

尚書

易高宗代鬼方今云尚書
得非通稱上古或逸書乎

中書省請冊皇后表

錢珣

臣某等言伏聞禮云男正位于外女正位于內乃欲承天休正人紀事宗廟奉蒸嘗是以詩有關雎貫三百篇之首用以佐天下而正夫婦乃政之所由興也伏以聖唐積仁累德列聖重光莫不師古以訓人弘禮以敦本遂得九垓從化萬國用康曩者彝倫稍愆王道微缺使龍樓曠主鬯之位翟衣闕助祭之規則外和而國安內和而家理安得而致也必將有以待之伏惟陛下續列

聖之洪業恢百王之令圖爰建東宮再振墜典凡居寰
海莫不忻歡百辟庶臣所懷尚懃蓋以中壺之位未立
六宮之政未崇臣案天極四星一為正妃上天垂象不
可虛其應伏聞淑妃某氏以坤厚之性母範有融淑懿
之姿光乎內理用能誕生哲嗣克當天心竊願陛下思
啓大猷仰弘丕訓淑妃某氏特依故事冊為皇后使六
宮之內一以遵承所為王政之所由興而風化天下臣
等位叨近密職在絲綸朝廷舊章合有論請上期聖造

特賜允從輕冒宸嚴無任恐戰之至

史館王相公請冊淑妃何氏為皇后表

前人

臣某言臣聞乾坤相配所以全覆載之功日月相隨所以明照臨之道惟王建后惟后助王若乾坤相配以成功若日月相隨而行道古皇有制歷代皆然伏惟皇帝陛下法天作聖引古為師興邦則啓於聰明為禮必循於先哲然則中宮久曠陰教罔修伏自累朝遂同廢典

四海絕仰觀之表九嬪無所統之尊誰詠國風空垂易
象永惟委墜可謂因循漢氏以來舊章不易常先立后
始可建儲今元良已視於東朝而柔順未臨於內職既
虛正位莫叙大倫臣等每奉清光累陳彛憲竊詳睿旨
俯鑒愚衷請問守龜必當告吉掖庭累行詎無白鷺之
徵簡策正名宜受金螭之錫是以敢干旒宸進拜封章
伏乞申命有司擇定良日俾行盛禮自叶至公冒黷宸
衷臣等無任懇迫惶恐之至

文苑英華卷六百八

欽定四庫全書

文苑英華卷六百九

宋 李昉等 編

雜上請三

為崔大夫請入奏表二首

為劔南西川崔僕射再請入朝表一首

為益州父老請攝司馬鄧公為真表一首

為益州父老請留史司馬表一首

為益州父老請留博陵王表一首

為公卿請復常膳表一首

中書門下請進膳表一首

熒惑退舍宰相請復常膳表一首

為宗正卿請復常膳表一首

為鳳翔李尚書請使人拜掃表一首

代河南裴尹請拜掃表一首

請河北遭旱滂州準式折免表一首

代人至渭南縣降服請罪表一首

代人奉御批不許請罪謝恩表一首

駕幸長安起居表一首

代人行在起居表一首

代張侍郎起居表一首

為崔大夫請入奏表

李舟

臣某言臣以久違闕庭歲請朝覲在宣州日伏奉德音
且以河南用兵許臣事平入奏尋蒙寵命移鎮浙東臣
自至越州旋經歲序瞻戀宸極道路轉遙俯察微躬疾

病加劇實慮溘先朝露永謝明時昨者隨表便行冀蒙
聖恩昭許續奉進止所在令迴伏迫宸嚴不敢冒進臣
防身寡智處衆多尤但恐譴謗之聲日聞天聽浸潤之
漸將迴聖慈憂疹相并死亡無日臣管州郡幸無逋懸
西河之間又已寧靜伏願陛下察臣誠懇許臣朝謁實
冀犬馬之疾歸上國而蠲除風波之言仰皇明而昭鑒
無任懇迫之至

同前

臣某言臣一昨初承國哀號慕罔極已陳哀懇請赴山陵伏奉批答上遵違旨不許奔會玄宮甫閉攀扈無由永惟舊恩實延巨痛陛下自登寶位日月重光百靈昭蘇萬物咸覩臣限所守僻在海隅遐瞻闕庭未獲稱慶陛下湛恩雨施大號風行繁徃頓除窮海知化臣管內州郡幸獲安帖在臣使務必有常規將臨元會之期倍切朝宗之戀伏願許臣暫趨天闕獲覲龍顏集稟命於聖君退宣風於遐壤臣死生無恨榮願之至

為劔南西川崔僕射再請入朝表

于邵

臣某言去冬臣知衙事官姚悟迴伏奉手詔許臣入朝

臣自西川

一作山

軍還理裝撰吉與監軍使孟游仙等以

今月五日發成都十二日至綿州羅江縣中使馬承積

至又奉恩旨令臣與遊仙等却迴臣久辭闕庭從事邊

塞思一朝覲如天無階忽遂此行神道所感豈知中路

猶阻懇誠揮涕慙對於三軍結戀詎同於他日臣所行

意實不謀身一欲辯折讒

一作戎

間兼欲敷陳國要有不

可形之翰墨有不可傳之外人表臣心切唯天而已將
士等知臣悃欵共憂家國見臣不行魂氣俱喪臣以迫
於所務抱恨南邊固請監軍使行猶期上訴雖一夫阻
命而違衆實難遊仙今於漢州便發以從諸將之請軍
中務要悉以咨之伏乞聖聰俯遂羣議則冀上輯下睦
永無外虞西南艱危再沐清晏豈臣獨夫之幸實充萬
人之幸無任懇迫屏營之至謹附監軍使孟遊仙奉表

陳請以聞

益州父老請攝司馬鄧公為真表

閻丘均

臣聞天工人代安危所存得其情則風化淳厚失其性則眚庶流離臣等本部益州司馬臣某雅慮忠純貞心剛克通識人理博綜古言州無牧伯居攝端右靜以鎮撫物情功乃隱於視聽事益於國家故不可一二而言也臣又聞寇恂為郡甚得人心將拜汝南百姓遮道漢

皇如請竟留一歲敢緣斯義上犯天顏伏乞陛下憫垂涕之慈惠黎民之願即其所守除以為真使生人無惜去之嗟孤貧有永綏之賴則上下咸得中和可期伏表上祈以驚以震云云

此篇元編在五百七十八卷辭讓門今移入於此為益州父老請留史司馬表

益州大都督府草莽臣某等若干人謹冒死言臣聞理有所藉潁州重覩於黃霸惜其不可河南一借於寇恂

古之恩迹今亦宜有臣等出身草莽茂育玄德井飲田
食齒老年衰安全家道傾疑遂天性皆賴陛下聖情恩
利惠及蒼生擇循吏以共康官賢才而俾牧者也臣州
佐某官英明興疑氣忠志居心該舉墳典猶協文史充
美價於一省著能聲於邦國緹油至止光輔藩維體要
而庶政必凝憂勤而自公知退伏見今日日除節彭州
刺史璽函適到熊軾將登吏人傳聞驚嗟相惜臣聞天
地之道每從人欲帝王之義必順人心所以黎庶安寧

上下禔福今此百姓乞留一年庶得服習其教而易安
優柔其道而自得闔闔天遠上祈猶難伏乞聖慈回睭
殊渙中留停已出之旨復如初之望使祈一作折心重至
驚魂還歸時雨一霑同養萬物無任瞻望佇迴之至

益州父老請留博陵王表

臣某言臣伏見陛下睿圖興復寶命維新救寓縣於帖
危拯蒼生於塗炭凡在戴髮孰不幸甚蜀鄉財產古稱
天府疲弊始西軍之役屢空極疑冒賄之夫滿路吁嗟

棄親亡散維貸是視愛養誰能陛下所以惠賜藩王鎮

撫梁益因之傳

一作博

利期以政成而玄晞至止纔移弦

朔除替旋聞臨筵不暖陛下與而奪之勾萌未達於方

春濟舟忽度於中水天下何謂亡

疑

此哀憐今者百姓

甚性

一作情

於官人貪富

疑作留

玄晞缺師恩缺斯弊遂革

美其風而不見其好移其政而不失其宜且益州者列

岳之雄望玄晞者朝廷之忠良明使是推能術尤急理

以才名相副義與隨時不乖陛下何惜一賢以遺百姓

特望俯迴授受留借期年瀝懇上陳馳情無地瞻帝閣
而遐叫佇天睠而西流獲遂丹誠戴恩瞑目無任悃欵
屏營之至

為公卿請復常膳第二表

臣某等言前以減膳日久憂損聖躬率土迴惶輕陳管
見而孝情凝邈猶未俯同誠不感天增其履薄臣聞先
王垂教以禮制情聖人無心以身從物故能上安七廟
下字兆民唐諱所以孝治唐諱莫非斯道伏惟陛下率由過

禮至性光前想終身之憂懷茹荼之酷愆子卯之制淹
晦朔之期生靈皆所不堪聖體必將勞頓貽臣子之危
懼忘社稷之晏虞緬善靡達

一作緬
茲一善

方招兩失求諸典

故兼且未安詢及普天孰云其可既守高祖之天下為
萬國之歡心先當愛身以寧宗社無宜獨善用杜衆情
伏願俯順禮經仰迴天眷則羣臣荷賴庶品咸康不任
懇切之至

中書門下請進膳表

常袞

臣某言伏奉以華陽公主攝和稍

類表作小

乖思念所切齋

宮親禱輟膳終朝臣等下情不遑寸刻竊以經時之疾
變節或加分至所臨晦明異狀漸過其後旋即如初頃
嘗驗之多亦然矣陛下以海內之衆子育寧殊豈天屬
之間皇慈獨軫伏願忘懷澹慮常膳以時保安聖躬用
慰臣下屬茲煩暑尤切懇誠謹奉表陳露以間無任兢
惶迫切之至

熒惑退舍宰相請復常膳表 錢珝

臣某等言今月某日伏奉批詔以臣累陳列宿之間熒
惑退舍所宜升臨正殿進復常羞而睿聽彌高羣誠莫
遂顧台星之有位居公府以不遑伏惟陛下道合秉陽
事皆師古稟天明於垂象察時變以側身克示允恭未
忘戒懼考乎經籍實契規摹雖退就卑宮儉惟降食方
期應感合舉典彛然而芒角既收運行已順歷懇亦循
於故實拜章敢惑於聰明而玄鑒未開丹心如燭鋪陳
無序裨贊失圖伏以大配乾坤重承宗廟執禮必遺於

小者推誠皆可以貫之則行正道以臨萬邦不在乎不
居法座也布王澤而滋庶物不在乎不食重味也而陛
下未嘗不行正道於遐邇布王澤於細微苟行之有終
弘之不已則天惟輔德心實彌災視棟宇而自安御豆
籩而何爽敢祈聖鑒必念斯言伏惟俯徇愚誠特允所
奏干冒疏宸臣無任云云

為宗正卿請復常膳表

臣某等言今月某日伏奉批詔以臣所請復常膳御正

殿未賜允許者臣等恭承詔旨竊仰聖謀以為前史所垂正言可取則應天動人之事實哲王致理之先然臣伏思陛下繼體以來推誠必至友愛之道顯教萬方惻隱之心罔遺一物於王師致討司寇用刑率皆毒被蒸人罪興衆怒救殘虐之極弊懲悖亂之元兇而後効順立功報之爵祿勞心焦思痛在瘡痍屢降德音勤行王道得非應天以實而動人以行哉况謫見之後戒懼不遑朝野所知星辰所照則大官進御路寢燕居既舉舊

章將踰期月固可以特開睿鑒俯徇羣心理且叶於至
公事兼存於大體臣某等謬居宗緒敢貢飾詞盡布腹
心復干宸扆無任仰望兢越屏營之至

為鳳翔李尚書請使人拜掃表 韓翊

臣某言臣聞子之能仕父教之忠臣仕雖無聞忠冀盡
力當陛下至理之日偶四方無事之時臣幸揚名清朝
全節聖代於臣之分榮感多焉而罔極之心未遑省告
伏以先臣墳墓遠在定州道路所經瞻馳靡及臣自入

宿衛三十四年頃者師旅雖寧武臣分閫臣職叨禁近
事絕私情弘覆之德靡所不容而兢懼之誠實自難處
空懷怵惕之感莫申展奠之儀今寰宇廓清憂疑必釋
當天下交泰之際是人神叶吉之期臣寄重藩維不合
上請今遣弟某官某專拜掃以道途所近便取北路赴
定州輒披懇誠無任兢惶云云

代河南裴尹請拜掃表

令狐楚

臣某言臣聞天地之大曲成於品物臣子之心無隱於

君父下情上達至化旁流伏惟開元天寶聖文神武應
道皇帝陛下睿謀作聖孝理奉天蒼生之願不違皇極
之慈廣運不以臣微劣無取累擢大官位高尹京職重
居守犬馬陳力未酬明主之恩霜露感懷遽有私家之
請臣其中謝先臣墳墓俯在近郊頃歲以來闕伸拜掃
每至寒節展臣情禮晨往暮還所職無闕又臣於墳塋
立碑恐其向就建樹之際獲遂躬親重泉承日月之光
舉宗蒙雨露之澤不勝罔極之至

請河北遭旱澇州準式折免表

張廷珪

臣廷珪言伏見景龍二年三月十一日勅河南河北桑蠶
倍多風土異宜租庸須別自今以後河南河北蚕熟依
限即輸庸調秋苗若損唯令折租乃為常式者臣聞皇
天無私覆后土無私載日月無私鑒陰陽無私毓是以
明王聖帝則而像之慶浹萬邦政敷文德故書曰無偏
無黨王道蕩蕩無反無側王道正直伏惟聖朝御歷皇

極在人正朔所覃率土奉若百年于茲矣頃於災歲重賦饑人頓革彝典特開變例雖施蠻貊之邦臣愚猶知不可况此兩道枕倚大河南接神州上通天邑郡縣雄劇人物昌阜既類股肱之地尤宜得其欣心豈可殊其土風異其徭賦不恤災患而殫其財力者即以桑蠶別加徵稅至如隴右百姓羊馬是資山南諸州椒漆為利其或銅錫鉛錯貨自巖通蜃蛤魚鹽財自海殖土物惟性錯貢

四字一作惟錯

方隅咸有滂年並無他稅旱歲各準常

規豈獨斯人外之王度且天災所降年穀莫登在於貧弱或至殍殮生理既其難恃人心固未易安就其憂危載空杼軸窮斯濫矣將無不至臣効官穎服在河南每見部人衆稱冤苦伏思景龍之際時多賊臣有若宋慕容紀處訥武延秀常溫等蔽虧日月專擅威權各食封遍河南河北屬當水旱屢致蠲除因而遂矯制命固非先朝之本意也伏願陛下廣天成之德均子育之愛式崇大體追復舊章許河南河北有水旱處依貞觀永徽

故事一準令式折免則在蒼生不勝幸甚謹因所部法
司參軍鄭玄亮奏滂損謹附表以聞

代人至渭南縣降服請罪表 韓 翊

臣某言臣自出邊鄙素無才術頃因寇難累効驅馳遂
荷殊私謬膺重寄介於偏僻密邇寇讐備歷艱危得全
節義遼陽移拔趙北掃除皆伏威靈非臣力致幸逢清
廓輒自寬閒麾下不虞舟中生變坐移疑作顛沛實愧
無謀縱欲粉身於何塞責陛下念臣微効未即書刑許

歸朝廷俾露誠懇王畿日近聖問存臨雖承雨露恩深
其若丘山罪重闕庭進對臣亦胡顏缺鉞就誅甘當碎
首謹於路側降服而囚且十年以來秉戎律者其於綏
撫或有乖方不待刑章弊於部曲隱而不數斯革亦多
臣以負罪雖同免罹其禍幸全膏領伏俟天誅臣之為
榮死亦不朽臣無任懇款之至

代人奉御批不許請罪謝恩表 前人

臣某言奏事官蘇翼迴伏奉聖造答表勒臣即復章綬

連赴闕庭捧讀震驚心魂爽越臣某中謝臣智稱統戎
罪深負國奉期死所翻荷生成恩承主偏法為臣屈迴
謝九原之路仰銜再造之功拜命之初不勝忤躍臣即
匍匐拜謝闕庭無任感戴

云

駕幸長安起居表

武后時

富嘉謨

臣某言伏奉車駕以今月二十二日西至長安臣聞咸
秦輿壤河洛舊區王者是宅因時順動故睿情載佇西
睽邦土玉輶金根天旋雲被皇輿凱入在藻知歸臣忝

葭莩謬膺垣翰尹京靡託陪鑿遂阻紫宸漸遙丹慊空
積伏惟祁寒在候輦路逶迤法駕就蹕聖躬多祐然後
闕天陞而臨舊都巡卜征而考元吉者也無任悅豫之
至謹遣某官奉表以聞

代人行在起居表

德宗時

于公異

臣某言自中使至伏奉手詔後行在所未有人至伏以
巴梁既遠信使全稀路有豺狼時當否塞東征西怨彼
雖幸於南巡捧日望雲臣獨瞻於北極伏惟陛下以重

慎為意以社稷為心每於寢膳

類表
作食

必盡頤攝况朱明

啓夏小暑屆時曾觀蜀漢之風小異咸

類表
作並

秦之氣尚

衣侍膳之分莫敢侵官資父事君之誠空思入面違奉
既久涕戀無從不任之至

同前

羊士諤

臣某言臣以菲才親奉昌運受藩隅之重任

類表
作寄

効犬

馬之微誠惟君知臣特受恩獎夙興夕惕榮懼積中臣
其中謝伏以租稅之殷江鄉為重閭井之化水旱是虞

臣職有分憂期於富庶宣陛下雨露之惠令獲小康守
朝廷刑賞之規敢思中立條賦斂以辦集除疾苦而均
安閉閣齋心仰思類表
作答玄造竊以聖慈廣被每念遐方
臣忝守官合具聞達

代張侍郎起居表


呂溫

臣某言孟秋猶集作
尚熱伏惟聖躬萬福臣以去月二十

一日到薄安山見蕃胡尚綺里徐等同集作
固令盈珍等

却迴奏事令臣取今月發赴衙帳者伏惟聖德集作
澤非柔

遠皇明獨幽蕃情大歡首帥知感虔奉朝旨賓禮使臣
迎勞肅恭饋餼豐潔益知集作明嚮化彌表革心臣恭備
單車不勝慶抃嚴程方始絕域未窮白日在天瞻仰如
近青蒲之地伏奏猶賒感戀彷徨罔知攸措無任犬馬
屏營之至謹因中使第五忠憲附表起居以聞



文苑英華卷六百九

欽定四庫全書

集部

文苑英華卷六百十二

詳校官給事中_臣李臺

助教臣常循覆勘

總校官進士_臣朱鉉

校對官中書_臣胡紹基

校對官中書_臣王瑣

謄錄監生_臣李維瀛

謄錄監生_臣陳煜

欽定四庫全書

文苑英華卷六百十

宋 李昉等 編

進文章

一進文章表二卷英華所編失年代先後今正之

進象經賦表一首

聖製故司空魏徵挽歌詞表一首

為李祕書上祖集表一首

上九成宮頌表一首

上拜南郊頌表一首

進洛圖頌表一首

為朝集使絳州刺史孔禎等進大酺詩表一首

為鳳閣侍郎王方慶進書法表一首

為鳳閣侍郎王方慶進南齊臨軒圖表一首

進神鳳頌表一首

為陳御史進奉和秋景觀競渡詩表一首

進東嶽朝覲頌表一首

進孝烏頌表一首

進喜雪詩表一首

進封西嶽賦表一首

進鵬賦表一首

為陳正卿進續尚書表一首

進象經賦表

周武帝

庾信

臣某言臣伏讀聖製象經并觀象戲私心踴躍不勝抃舞伏以性與天道本絕尋求直以懸諸日月遂獲瞻仰九州既奠近對河圖四轍中繩全觀玉策未飛玄鶴先

聞金石之聲不上赤城獨見煙霞之氣置管而測光景
愈高沉玉而觀淵泉益遠寢不自涯課虛為賦詞非寥
亮學無雕刻遂敢陳述誠為厚顏况復日之遠近本非
童子所問天之渾蓋豈是書生所談冒用奏聞伏增流
汗之至

聖製故司空魏徵挽歌詞表

唐太宗

褚亮

臣亮言伏見聖製故司空鄭國公挽詞十首詞窮清曲

理備哀傷漢武北管之書更慙追遠魏文南皮之歎取
愧悼亡與辰緯而相暉隨鍾石而俱振魏徵早逢興運
譽美當朝為聖主之賢臣預能官於多士出納通顯憑
藉寵私忠誠所到心力同盡而逝水不追清徽永謝樹
碑荒壠已叨相質之文哀歌泉路復降高堂之曲事重
一時榮流千載臣趨侍學林竊觀睿藻不入玉山屢逢
盈尺如遊珠水常都照車慶抃之深唯知舞詠不任下

情

為李祕書上祖集表

上官儀

臣某言臣聞漢朝中葉陳農求訪於圖書魏歷初基表
渙請收於篇籍遂使容臺增飾曲府載輝雅道照於前
古風流被於末裔伏惟陛下睿德緯天神功光表截海
班朔益地延圖垂衣視典探羣玉之幽蹟虛已緣情動
兼金之歌詠由是芸香祕室青簡具陳璧水上庠漆書
咸集臣大父隋金州刺史元操筮仕登朝官成三代學
綜書部思洽詞源雖歲序寂寥微塵無弭河東薛道衡

人推才傑范陽盧思道時號文宗並叶契相忘齊聲比
價競炫梁車之寶爭擒鄴騎之珍而二家文集久蒙宸
照獨於臣門未汙天燭貽厥之訓在臣宜守獻書之典
有國通規今繕寫已訖合若干卷謹詣闕奉進

上九成宮頌表

高宗

王勃

臣某言臣聞帝機無朕道洽則時邕靈化不言功成則
頌顯伏惟陛下體元纂極模神建隧疑棟梁三氣疑庭
衝六合松軒夜警杳冥姑射之心茅殿晨凝寥廓峒山

之駕臣霑風太上庇影華胥仰衢室而無階候襄城而有地雖望卑平叔空勤景福之詞而文謝子雲願竭甘泉之思謹憑天造輒貢九成宮頌二十四章攀紫墀而絕望叫丹闕而累息臣誠惶誠恐死罪死罪謹言

上拜南郊頌表

高宗

前人

臣伏見摠章元年十二月四日詔既清東寇將覲南岳甫資元勲旋窺大典伏惟皇帝陛下黼藻神器銜策睿圖用天老之前機戮防風之後至為而不恃懸寶位於

中宸卑以自居託靈符於上帝禮凝蒼壁瑞溢玄珪紫
旻降祐黃祗叶矩微臣學不照吉才不曠時窺宇宙之
神功覩郊禋之盛節時非苟邁懷雅頌而知歸道不虛
行想謳歌而有志豈與夫周傳考室裁稱棟宇之規漢
奏甘泉未息嬉遊之諷比興衰於列代較馳驟於同衢
而已謹憑天則輒貢拜南郊頌十章文不足竒意有遺
美臣誠惶誠恐謹言

進洛圖頌表

武后

崔融

臣某言奉某年月日勅令臣撰洛圖頌伏以陛下聖烈

豐懿應期首出珍

一作元

符炳鑠曠代罕聞雖臯繇歌虞

伯禹申歎其或生於今日尚不足以談天况臣涉學蓋

淺揆才多陋安可潤色皇化對揚神休竊讀古文幽尋

舊式言大道者莫先於典誥序以之生焉美盛德者莫

近於詩什頌以之成焉其辭婉而微其事簡而要今臣

斟酌前訓擬議鴻猷述洛圖頌一篇并序謹詣宣議

一作

義門奉進誠未能探索玄奧憲章經書庶幾竭肝膽効

塵露增日月之末光階天地而不朽斯亦微臣之願足
矣臣拜手稽首冒瀕以聞死罪死罪

為朝集使絳州刺史孔禎等進大酺詩表

武后

李嶠

臣禎等言臣間謠誦必採而風俗可觀舞詠既陳而德音不泯伏惟金輪聖神皇帝陛下金口屈道璿樞正辰
慶徽號於法宮撫懷生於淨國玄猷再闡紫極重光天
地合德而同休黎氓改視而易聽萬方欣戴百寮抃舞

臣等備列下藩預承大慶三年入計行趨玉帛之禮五日賜酺即奏雲天之宴觀光靈之赫奕接恩賜之綢繆酬報何階空誓心而銘骨嗟嘆不足遂抽毫而授簡非効狂而貢斐實有感而求音同盍各於二三冀揄揚於萬一并題序引式光鴻造雖戴天辯日誠不窺於兩童而講德陳詩庶無慙於四言不量踈野輕敢薦聞繕寫畢功進上如別繫轅之陋輒造響於雲門化草之微遂馳光於日谷旋顧庸鄙追增悚汗臣禎等無任

為鳳閣侍郎王方慶進書法表

武后

前人

臣某言奉墨勅令臣家所有書法並將進來但臣家書法屬隋季亂離並多墜失臣十代再從伯祖羲之書先有四十餘紙貞觀十二年太宗文武皇帝購求遺迹臣亡父先臣私直並將奉進一不敢留今之所存唯有一卷并臣十一代祖導已下書一秩十卷謹隨狀進上但臣弓冶不嗣堂構缺然雖奉納楹多逢壞壁亡失之外

所餘無幾私珍緹襲方遺子孫不謂兩曜迴光九霄俯
聽曲延採拾遂登旒宸使千載遺寶重增於光價九泉
深隧更奉於恩渥寵被私門榮霑異代懷恩慕遠感佩
魚深臣方慶誠惶誠恐頓首頓首死罪死罪謹言

為鳳閣侍郎王方慶進南齊臨軒圖表

臣某言臣家有齊帝臨軒圖是南齊表倩下手所畫私
門傳寶以為妙絕伏惟聖情兼尚睿鑒旁周稽古軼於
虞聰幽求過於魏覽萬機多暇百代可知或厭遊娛儻

存觀省臣暮年多幸得奉休明竊謂珍竒無容隱默近
從京宅取到不獲早以上聞今謹詣闕隨狀奉進輕塵
疏宸伏用慙惶屏營之至

進神鳳頌表

武后

陳子昂

天授元年

臣子昂言臣聞昔周道昌而頌聲作遂能昭配天地光
烈祖宗垂之無窮永為代典伏惟聖神皇帝陛下闡玄
極昇紫圖光有唐基以啓周室不改舊物天下惟新皇
王已來未嘗覩也臣聞仲尼曰聖人丘不得而見之矣

又曰舜禹之有天下丘不預也又曰鳳鳥不至河不出
圖丘已矣夫皆傷不得見大道之行而鬱悒也臣草鄙
愚陋生長休明親逢聖人又覩昌運舜禹之政河洛之
圖悉皆目見幸亦多矣今者鳳鳥來赤雀至慶雲見休
氣昇大周受命之珍符也不稽元命探祕文採風謠揮
象物紀天人之會以協頌聲則臣下之過也有國彛典
其可闕乎臣不揣固集作朴陋輒獻神鳳頌四章以言大
周受命之事誠未足以潤色鴻業揄揚盛美亦小臣區

區丹慊

文粹作悃

之至謹詣洛城南奉進塵冒冕旒伏表慙

惶云云

為陳御史進奉和秋景觀競渡詩表

武后

前人

臣某言臣伏見去月日御製秋景務餘聊觀競渡故陳
先作式佇來篇凡六韻天文爰降品彙咸亨金簡潛開
珍圖斯見臣聞白雲興詠漢遊汾水之詞黃竹申歌周
舞瑤池之駕然而志崇遠轍事式

集作或

勞人故文思之

化未光太清之道猶

集作

闕伏惟聖母神皇陛下太虹

齊聖感月含神玄德茂於皇階文明照於天下用能提

玉斗把

集作

璇衡百神景從三靈叶贊青雲出洛爰開

受命之符赤甲紫河終御興王之寶非窮神之至德者

其孰能格

集作

於是哉既而黃屋務閑紫極時暇洞庭

張樂思接軫於軒遊媯水披圖想同叅於堯輦然而遠

而勞物者未若近而安人動而勤已者豈比靜而神泰

於是徙金蹕鳴玉鑿清禁林御池殿肅波臣

集作

而戒

事命舟子為水嬉彩鷁蓮歌乍起吳江集作江吳之引青龍

桂檝時謳越女

集作時怪殿越

之風鳥逝蚪

集作蚪

驚沸珠潭而

競逐雪飛電集橫玉浦而流光信可以娛樂性靈發揮

文物皇歡允洽白日俄光於是奏薰風於管絃詠嚴雲

於林籟帝歌爰作天藻遐集作遐彰黼帳帷宮縵文房之

綉綵祥煙

集作雲

瑞景霏翰苑之榮光信探賸

集作道

於玄

苞得斯文於紫極太平允矣元首康哉方欲朝明堂之

宮輯

集作受

羣后之瑞尊崇顯錄

集作號

光啓聖圖封玉嵩

丘以接千年之統泥金少室攸增萬歲之規卓哉煌煌
聖君之表也微臣曲學蓬戶竊位蘭臺未聞驄馬之謠
非有雕龍之思鞠躬霜署謬覩於天章逖聽鈞臺側聞
於帝樂天文尊貴不遠於下臣帝寶珠集作珍崇曲宣於
近貴竊以為君唱臣和固不隔於尊卑宮變商從方允
諧於金石輒用齋心扣寂假翰求詞將以攀日月之末
光繼螢爝之微照不勝云

進東嶽朝覲頌表

玄宗

蘇頌

臣頹言臣學不淵

唐諱

博詞蓋實滯陛下過聽被恩最久

喜規封岱增天帝王壯觀臣以宗伯秩禮陪清道之輿

臣之幸一也又伏覩自天垂象銘岳昭訓臣已有司上

載封禪

一作光封

之烈臣之幸二也臣再三之幸萬百常情

臣某

中謝

臣東京奉旨竊聞刻石三頌臣草一敷聖主之

玄猷次紀宰臣之鴻筆斯事至大咎繇吉甫之難也臣

自料度不勝惶悚而議者謂臣光榮之至死且不朽臣

以羸疾翳然言罕能述忠闕

愚臣極思慮罄肝膽而

為之伏希演脩德之符非敢助親丈之化儻以潤色鴻業一蒙睿覽則臣之至懇萬殞知歸輕塵冕旒若寘冰谷無任區區戰灼之至

進孝烏頌表

楊譚

草莽臣譚言臣聞自昔皇王撫運提象天錫禎應以光盛業臣伏見以為至道有孚能招異類深仁所協克順天心陛下孝理天下孩視羣動恩被羽族感通陽精雖器車馬圖洋溢祕府而黃龍丹雀委積近郊此或為常

不甚專美豈如孝烏俯爾營巢不懼不驚以育羣子臣

幸逢昌運好覽休祥萬古殄圖安能有此百代良史未

之前聞况宿

一作肅

穆紫宸曉夕嚴警會弁星列瓜士雲

屯燕雀飛梁無相賀之所魚龍在棟成駭目之觀唯此

孝烏晏然能馴明陛下深愛子物之慈表皇太子歸哺

報恩之孝首出象

疑作衆

瑞莫與之齊謹按符瑞圖云宗

廟肅敬則孝烏至昔范覽對蜀主言慈烏知孝誠養之

禽必有缺方懷而至者陛下聖策遠備威震遐戎略地

攻城無歲不克巴蜀之外今斯獲醜慈烏効祉可謂有
徵加以遠降日輪近巢天宇據北辰以永固豈南飛以
遠枝自古攸傳無聞此瑞願陳不朽垂裕將來謹獻孝
烏旌德頌七首雖論揚之美有愧於清風葵藿之心無
忘於捧日謹投延恩匭奉表以聞冒觸宸嚴伏增戰越
臣譚誠恐頓首死罪謹告

進喜雪詩表

李邕

臣邕言一昨瑞雪憇期農人阻望陛下以億兆勤慮倉

稟貽憂禋祀玄冥祈禱黑帝固能至誠應物聖德動天
朔雪下於龍山海神朝於鳳闕是以途歌邑舞野慶朝
歡荷一人之涯恩為四海之膏澤臣仰思揚化伏念輔
時雖力減鴻毛而情殷鶴立無任喜躍慶賀之至謹昧
死詣金闕門陳表貢詩一章臣邕誠惶誠恐

進封西嶽賦表

玄宗

杜甫

臣甫言臣本杜陵諸生年過四十經術淺陋進無補於
明時退常困於衣食蓋長安一匹夫耳頃歲國家有事

于集作於郊廟幸得奏賦待制於集賢委學官試文章再

降恩澤仍猥以臣名實相副送隸有司叅列選序然臣之本分甘棄置永疑始望不及此豈意頭白之後竟以

短篇隻字遂曾聞徹辰極一動人主是臣無負於文少

集作少多病貧窮好學者也集作已在臣光榮雖死萬足至

於仕進非所集作敢望也日夜憂迫復未知何以上答聖

慈明臣子之効况臣常有肺氣之疾恐忽復先草露塗糞土而所懷冥漠實孤負皇恩敢攄竭憤憑領略不則

作封西嶽賦一首以勸所覲明主覽而留意焉先是御

製西嶽碑文之卒章曰待予安人富國然後徐思其事

此蓋陛下之至謙也今茲人安是也集作已今茲國富是

也集作已况符瑞翕習福應交至何翠華之脉脉乎維嶽

固陛下本命以永一作承嗣業維嶽授陛下元弼克生司

空斯又不可以寢也集作已伏惟天子霈然留意焉春將

披圖視典冬乃展采錯事日尚浩闊人匪勞止庶可試

哉微臣不任區區懇禱之極謹詣延恩匭奉表進賦以

聞臣甫誠惶誠恐頓首頓首謹言

進鵬賦表

已見一百二十六卷
玄宗

前人

為陳正卿進續尚書表

玄宗

蕭穎士

臣某言臣林莽介賤幼而強學竊聞諸大易之說曰觀乎天文以察時變觀乎人文以化成天下夫察乎變者立德以貞其象成乎化者立言以贊其効故太極列三階五緯於上聖人著三墳五典於下至哉文乎天人合應名數指歸之大統也今之言文字者始於太昊徵訓

典者本於唐堯振頽綱者孰若漢朝興盛業

一作言

者莫

如聖代是則太昊朕之軒轅章之唐堯祖之虞舜述之

漢高作之光武維之祖宗開之陛下因

一作固

之臣愚以

為太昊至于

一作於

我高祖太宗軒轅之于

一作於

我開元

聖文神武皇帝陛下稱廣運者四代繼成功者四君咸

宣布昭睿典光熙德政矣然則伏羲創文籍黃帝立史

官太古淳奧權輿朴略至陶唐氏而後大備故孔子美

之曰堯之為君也煥乎其有文章由是叙帝王之書首

唐虞之典於堯則曰欽明文思於舜則曰誕敷文德

之時義大矣哉夏商已後德弗及舜仲尼雖一作雜目其

書而不為典言未能察變成化比唐虞之際也何則夏

之興也泣辜殊於政一作至理殷之興也慙德乖於雅樂

周之興也謂武微於盡善其不為帝典宜矣陵夷借亂

以暨暴秦剗亂墳籍瞽聾兆庶王者之風殄矣先王一作

生之道窮矣天之未喪斯文也故帝道復興於漢家數

百年中一作間而憲章具舉夫其推步律歷帝堯分命之

典也增修封禪帝舜時巡之義也約三章之法以正咎

繇之刑班四時之舞以續

一作續

后夔之樂臣竊覩

一作觀

三代之作貽範垂訓體國綏人雖載祀繇

一作延

長德澤

深遠皆因循轍迹故弗易其事孔子曰殷因於夏禮周

因於殷禮所損益可知也未有踵七雄交爭

一作戰

之末

繼六籍焚如之後帝典缺而更張淳風醜而載洽若夫

漢氏之難者也

八字一作若大漢者也

且義帝之喪三軍縞服異

夫湯武之放弒其君矣諸呂之郤

一作亂

浹辰底定異夫

羿浞之驟移其祚矣中興之盛華戎率服異夫吳楚之
僭竊其名矣夫如有漢之美固可以肩虞后千載一
時之運歟曹馬以還曾何足擬四分五裂朝成暮敗其
間雖晉平吳蜀隋舉梁陳混并未幾危亡荐及法令不
足以禁齊人聲名不足以垂後裔其於帝道踈矣又况
乎南遷淮海北起胡一作獯戎者邪茲又二朝之不若也
臣聞乾道運行否終則泰上帝有以輔文明之哲后表
光宅之休期必將乘喪亂之極繼驅除之運故有周之

末禮樂崩壞連橫合從俱非正朔則秦氏略定而漢代以興在晉之亡寓縣崩拆南吳北虜各擅名號則隋氏削平而聖朝以作此天意也不然何秦隋二葉而亡也若彼唐漢一家之盛也如此於赫盛唐正百王之闕思丈陛下光五聖之嗣啓運應期之符吊人伐罪之義制禮作樂之本郊天禪地之位萬庾三登之穰河海晏清

一作河
清海晏

之瑞舞七旬而殊俗格歌六律而薰風至故以

一作

騰子姒而絕景挹媯邪而高議矣又何東晉後魏

梁陳周齊之足道哉誠宜詔史官

一作臣

敷帝載炳唐虞

之故實黜遷固

一作商周

之遺制矣漢氏已略之於前皇唐

復曠之於後臣實惜焉知而不述則臣子之罪也臣誠

一作實

愚淺陋

一無陋字

竊不自揆敢緣聖朝稽古之道陛下

文思之德耕牧餘

一作解

暇輒復著書討尋載籍于茲一

紀謹上今文

四字一作今謹上

續尚書一部凡若干篇卷始有

漢二典次我唐二典以續夫前書堯舜之典也其餘文

景明章之後魏晉宋齊已還南訖有陳北起元魏歷周

隋洎夫高氏以至聖朝惣一十三一作二代詔策章疏頌

歌符檄忠臣之正議武士之權謀類而刊之次以年代

以續夫夏商周秦魯之篇也臣聞古者右史記事左史

記言舉其大略前書之義備矣孔聖沒而微言絕暴秦

興而挾書罪雖戰國遺策舊章駁亂於從橫漢臣著紀

新體互紛

一作約

於表志其道末者其文雜其才淺者其

意煩豈聖人存易簡之旨盡芟夷之義也昔文宣脩帝

者之書究三王之季臣性非天縱學異人師稟生何幸

親逢帝

一作聖

代此皆文武聖皇之遺旨臣愚曷足以知

之何者臣嘗伏讀貞觀實錄昔太宗因聽政之暇觀覽

尚書謂侍臣曰朕每庶幾

一作希

唐虞亦欲公等齊肩稷

契又曰令數百年外讀我國史豈獨窺兩漢哉臣故知有漢之功業與我唐之化理俱可以繼夫唐虞之盛也

伏惟陛下玄德昭升至仁廣被迺二十一年正月制曰

各勵精一志

一作心

共興玄化俾蒼生登於仁壽天下還

於淳樸愚臣緬述太宗之旨伏思

一作惟

陛下之詔固非

宜一作取類於三代之間也勒成帝典不亦宜乎陛下睿

思雄飛宸章間發質文一變風雅大興臣聞水之細者
江海假其深材之短者棟梁資其峻陛下必謂臣所著
小有可觀賜以召見闕庭一垂試問臣採撫之外亦以
學文縱不能光揚盛美猶庶乎細水短材之益則聖旨
之含容大矣臣之誠願畢矣

文苑英華卷六百十